



黃楊集補遺目錄

五言古詩

甲午春寓延陵送從弟侑赴京師

題陸某寄元暈詩畫

答元暈夜坐見寄 和卜判官除草詩韻

次金別駕韻 立秋日啓文過訪

次朱子新韻 題秋溪釣隱圖

七言古詩

和曲林韻呈江椽 喜雨謠寄陶彥承

和文壽看木香花有感

養竹軒歌爲周莊吳達子道賦

茶蘼歌

和文壽見寄

五言律詩

宿怡神道院

喜仲肅兄弟過訪

宿洞虛宮童鍊師房

至正庚子二月十日舟中作

寄維久秀才

和元暈韻

久雨

答陶景文

七夕戲爲子平先生悼亡

和雲林題畫

七言律詩

白牡丹

過毘陵敬公留飲瑣翠亭兼簡陶師晉

寓延陵陳廣文景鍾日相慰勞作詩以謝

聞陶師晉過梅里亟歸相候仙舟已往興

寧以詩追之

自延陵歸適鈕彥功惠貺多品以詩謝之

過金園寺次丁彦誠韻簡茂上人楊文可

斑竹簾

題梅莊圖

寄童煉師二首

寄題慶日軒

送陶元庸之越

題謝氏友竹軒

題湖山小隱

寄明長老東白

寄飛卿

寄陶德和

寄季克姪

春雪和韻

芭蕉

謝顧存義貽畫竹

次李玉林韻

題呂氏滄浪亭

上徐相國

題天游畫

賀彦容弟得孫女

七言絕句

擬比紅兒賦解語花二首

詠玉繡毬花

題杜韋娘圖

次元翬春雪

附錄

栖碧處士壙誌銘

俞貞木

春草軒記

張翥

栖碧軒記

陳方

題貞固春草第二軒

劉衢

補遺目錄畢

栖碧先生黃楊集補遺

五言古詩

一先
下平

甲午春寓延陵送從弟侑赴京師

吾弟正年少。坎壈何相纏。省親適萬里。性命如
絲懸。福州遭艱虞。一月不得眠。委身事官長。奔
走草屨穿。勤勞達帥府。府主幸見憐。置之郎掾
間。玉樹臨清淵。指揮上京師。馳貢多錦韉。朝乘
驛樓騎。暮宿公家船。別我荒城隅。情親意何專。
念汝携幼弟。父母恩惓惓。家園苦零落。骨肉難

棄捐。江鴈影聯度。原鶴勢相先。身衝北塞雪。夢繞南閩煙。此行孝義激。豈爲功名牽。明明堯舜君。廟堂俱大賢。秉心雪父耻。刻骨示神天。公程慎勿違。客路加勉旃。酤酒不復醉。日暮徒留連。寒梅未破蘂。春月當空圓。握手忍爲別。再會知何年。物情戒失正。天理終好還。庭烏遂反哺。棗蔓增暉妍。

一屋二次
入聲 題陸某寄元翬詩畫

新詩遺明珠。清圖寫寒玉。二美從何來。天風墜

屋。屋下有佳士。孤吟坐煩促。披圖誦新詩。條然坐巖谷。瞻彼江上雲。飄飄謝羈束。夕影弄明月。朝光泛晴旭。念茲塵埃客。可望那可逐。願將綠綺琴。同歌紫芝曲。

仄韻 答元翬夜坐見寄

遠客悲素秋。荒園坐清夜。仰看河漢傾。寒暑傷代謝。孤懷不成吟。煩襟自陶寫。浩歌涼露零。起舞月明下。吟成無所寄。寄向同心者。

八庚 和卜判官除草詩韻

邊塵暗城郭。大道多榛荆。使君坐高堂。政治公
生明。屏除姦與惡。始覺心和平。虛庭愛清曠。厭
見蔓草生。呼童盡芟薙。從渠蘭蕙榮。况敷甘棠
陰。百里覆簷楹。斯民喜安堵。感此愛物情。恩澤
布田野。處處添租丁。鼓舞老布衣。詠歌締詩盟。
四支

次金別駕韻

世故忽云變。豈意身及之。出門復入門。大道登
欽戲。旌旗卷風雨。殺氣凌清夷。皇皇失歸途。遠
避東海陲。邑宰吾舊戚。留連琴水湄。論文向春
花。酌酒刈夏葵。悵然念鄉故。撫景徒增悲。譬彼
諸草木。榮瘁各有時。善保伯牙琴。終當逢子期。
永言敦舊好。題詩寄相思。

十一元

立秋日啓文過訪

雷雨洗炎熇。江鄉迎早秋。白首尚爲客。凄然生
我愁。美人期不來。哀吟如有求。吟罷復惆悵。獨
坐林塘幽。溪聲入戶響。開簾望維舟。飄飄衣冠
士。磊落神仙流。似非張憑舉。何殊王子猷。握手
喜傾倒。令我多病瘳。再拜延高堂。言論若爲儔。

重言苦相憶。魂夢長悠悠。一別已三月。逝景難
駐留。人生百年內。聚散如雲浮。且須共尊酒。豁
彼離別憂。况乃賢主人。義篤情綢繆。一觴復一
詠。殷勤相勸酬。客亦不我辭。盡飲醉卽休。林深
野色暝。天空霞彩收。浩歌登舟去。解衣眠柁樓。
遙憐獨醒處。月照荷花洲。題詩謝不敏。後會期
再謀。

及韻
次朱子新韻

避難言子城。潦倒無毀譽。翩翩佳公子。欣然兩

相晤。遂結忘年交。惟恨來何暮。因謀歸田計。扁
舟復東去。回首望故鄉。黃塵渺何處。美人隔秋
水。文采珊瑚樹。馳情若東流。日夕猶能駐。憂來
誦君詩。豁爾滌煩慮。何時覩顏色。青天卷雲霧。

十一真
六平

題秋溪釣隱圖

長林蔽秋日。飛雪捲秋旻。道人愛滄浪。爲結白
鷗鄰。渺渺泛舟楫。悠悠理絲綸。淡然適清興。豈
在鱸與蓴。偉哉桐江叟。千載高其人。笑彼桃源
圖。春花迷去津。

七言古詩

和曲林韻呈江掾

先生別去已旬日。風雨閉門愁思極。杖藜幾欲
過城南。路滑泥深足無力。買舟又擬入東郭。水
漲官橋三四尺。臨風悵望情轉深。兩臂安能生
羽翼。只愁吳淞江水泛。萬頃膏腴魚鼈食。先生
錦城春可憐。醉歌談笑公侯前。笙簫羅綺紛神
仙。紫薇郎君清且賢。風流文采羨少年。賦詩寫
畫秋毫顛。一時才傑誰齊肩。何時共載書畫船。

披開雲霧觀青天。

喜雨謠寄陶彥承

前年三冬雨不止。去年三冬井無水。今年春過
一月餘。昨夜雨聲纔入耳。信知好雨當時節。萬
物發生從此始。披衣起舞不復寐。坐待晨光動
書几。開門縱目覽山川。口不能吟心獨喜。膏腴
滿地沃焦枯。草木爭輝淨泥滓。黃金柳絲含綠
煙。白雪梅花亂紛委。汀草遙舒翡翠茵。海棠微
破胭脂蘂。江頭細麥迷町疇。溪上野蔬高尺只。

眼前物色總生意。卒歲豐穰定堪擬。家家歡喜
理桑麻。處處謳歌勤耒耜。東山泥軟屐齒穩。南
浦沙明舟可艤。融融麗日照乾坤。四民樂業春
風裏。最是君家棠棣花。相承春暉萼韡韡。香芹
出水魚正肥。慈竹成林筍尤美。儒冠聯翩綵衣
舞。不出庭闈奉甘旨。閉門無吏索租錢。長日潛
心醉經史。天時人事兩相得。江南幾家能若是。
嗟我胡爲客異鄉。白髮滿頭空老矣。春帆高挂
賦歸歟。故園殷勤問桃李。願得時和歲屢豐。教

子躬耕樂生理。衰年無以報涓埃。努力和庸奉
天子。

和文壽看木香花有感

百舌無聲楚鳩老。餘花漫亂爭春好。江頭一夜
風雨寒。朱萼丹葩淨如掃。三分春色水流東。木
香一架開天風。翡翠褰帷玉爲幄。氣薰龍麝日
融融。芳蕤翦綴瓊瑤屑。柔條偃蹇虬龍結。石牀
陰陰護碧雲。瑤草紛紛墜香雪。白玉洞。爲君開。
夢魂不到黃金臺。興來呼酒對花飲。醉豪搦筆

書幽懷。歌詩看花時已晚。嘆息流光逝無返。何
如秉燭宴終宵。落景從渠墮西巘。

養竹軒歌爲周莊吳達子道賦

高軒公子良不俗。不種奇花種脩竹。奇花照眼
一時紅。脩竹虚心萬年綠。春雷擊地新筍生。龍
角森森那忍觸。自鋤暖土厚栽培。手挈銀瓶細
澆沃。深根掃除螻蟻窟。香葉終期鳳凰宿。日使
霑濡雨露恩。歲寒豈憚冰霜酷。猗猗繞戶轟琅
玕。含霧連煙比淇澳。招搖皓月金瑣碎。勾引清

風聲。曼玉炎天展篔簹。臥蒼雪。春日聽鶯泛醺醪
可能一日暫相忘。坐對此君看不足。君不見白
樂天重言養竹比養賢。又不見東坡詩無竹士
俗不可醫。君今有竹善培養。會看直拂青雲上。

茶蘼歌

丹葩醉染猩猩血。素萼便娟比霜雪。呈妖逞艷
豈足貴。含芳嗜潔誇清絕。茶蘼飽浥春雨膏。玲
瓏剪刻英瓊瑤。千金腦麝和淑質。萬箇玉蝶縈
柔條。坐看明月花梢上。便應題作清虛榜。醉眠

花底不須歸。狼籍苔茵空撫掌。先生愛花何太
濃。對花一飲揮千鍾。昔逢端伯稱韻友。我欲結
好慚衰容。莫教搖落西風後。賈島留題傳不朽。
憐君爲作茶蘼歌。多情又釀醪酒。

四言
下平

和文壽見寄

闔閭城東婁塘坳。難兄難弟聞二豪。兄操法律
好權勢。弟飽文學矜風騷。煙塵湏洞不得見。渴
心焦思神徒勞。與兄後會虞山下。西湖東海相
遊遨。知君屏迹金溪上。故家喬木依江臯。奇花

羨竹自怡悅。舉世溷濁君清高。好山當戶積翡翠。
春水繞門泛葡萄。虛堂絳帳設孔席。應對灑掃
驅兒曹。絃歌雍容日以樂。割鷄便欲施牛刀。
長材自是棟梁器。顧我不直萊與蒿。時作蠅鳴
蚯蚓竅。豈比獨鶴能清嘯。故山豺虎歸未得。眷
茲樂土來奔逃。經綸事業非我用。詩禮之訓寧
忘操。文場馳騁慚潦倒。短戈折槊聊戰塵。邇來
解后喜莫逆。玉樹臨風識俊髦。明時搜賢網天
下。肯容滄海神龍韜。雷雲變化等閒事。賈生不

日須逢遭。江鄉風俗尚淳古。男勤稼穡女蠶繅。
最憐地僻車馬少。迴溪曲港皆乘舸。君住溪南
我溪北。一日不見心憂忒。願如雲龍兩相逐。安
得臂腋生羽毛。新詩絢爛驚老眼。長江巨壑翻
雲濤。

五言律詩

宿怡神道院

山房何闐寂。一榻可淹留。香繞池邊樹。燈明竹
外樓。道人終夜語。銷我百年憂。更覓神仙術。相

期汗漫遊

喜仲肅兄弟過訪

憶昨風塵際。愁傷骨肉心。清時重聚首。濁酒且
開襟。棗萼光還暎。鴿原誼更深。底須辭暮雨。相
與對牀吟。

宿洞虛宮童鍊師房

高士時相見。孤軒水竹清。積陰秋暑淨。倒景暮
霞明。坐語俱忘醉。行吟且放情。向來酬俗勸。隱
逸愧莊生。

六庚
上平

至正庚子二月十日舟中作

寄迹如萍梗。漂流無定居。生涯付舟楫。隨意學
樵漁。溪雨琉璃滑。山晴翡翠虛。春帆任所往。不
必問吾廬。

五微
上平

寄維久秀才

祇為索居久。遂令相見稀。知君讀書處。竟日掩
柴扉。夜雨添溪漲。晴雲隔岸飛。應同二三子。歌
詠舞春暉。

八庚
下平

和元翬韻

知君為客久。幾見草枯榮。兩鬢秋容老。孤吟夜
氣清。鄰鷄啼落月。城柝報殘更。應是相思切。題
詩寄遠情。

八齊
上平

久雨

江雨灑還稀。江雲濕更低。不愁吳水濶。惟恨楚
山迷。野鶴思高舉。林鳥慕穩棲。漸看晴景好。可
得溷塗泥。

十三文
上平

答陶景文

澤國多文采。風流獨數君。琴書元自樂。聲迹久

相聞。况是鷓鴣侶。寧同燕雀羣。野人搔白首。空
望碧霄雲。

十一九
下平

七夕戲爲子平先生悼亡

織女度河秋。文園生暮愁。雙鴛初失偶。孤鳳若
爲儔。有藥誰能曬。看書子解收。無端虛幌月。空
照曝衣樓。

七陽

和雲林題畫

下平

昔從九龍隱。來住百花莊。江上春樹碧。山中秋
草黃。放情揮翰墨。習靜愛林塘。莫道成樗散。終

期作棟梁。

七言律詩

上平

白牡丹

金縷杯承白。玉盤涓涓擎。露出瑤壇微。風卷幔
霓裳。舞皓月。窺闌雪。初寒嗜潔不從脂粉汚。惜
芳還許子孫看。沉香亭北繁華夢。妖血于今洗
未乾。

十庚
上平

過毘陵東門寺敬公留飲瑣翠亭兼簡陶

師晉

四簷脩竹絕煙埃。滿地清陰覆綠苔。冉冉只疑
雲影去。蕭蕭却訝雨聲來。深林掃榻期餘暇。高
節題詩愧不才。驪馬在門城郭暮。直須邀月共
銜杯。

六魚寓延陵辱陳廣文景鍾日相慰勞作詩以
謝

荒城爲客故人疎。賴爾論文得近居。每自藻芹
歸子佩。不辭風雨過吾廬。攜將華饌慚何限。酬
酢清詩喜有餘。却憶兵戈千里隔。相看白髮倍

相於。

八庚聞陶師晉過梅里亟歸相候仙舟已往與
寧以詩追之

勞君杖屨到柴扃。城郭歸遲少候迎。只訝子猷
初盡興。莫嗔安道不關情。酒杯已及三年別。懷
抱那能一語傾。野外自憐供給少。迴舟毋惜片
時程。

六魚自延陵歸適馬跡山鈕彥功惠貺多品以
詩謝之

旅宿延陵故舊疎。歸來喜得萬金書。兵戈契濶親逾密。筐篚交陳禮不虛。山茗久藏春雨後。園梅新摘曉煙初。似聞鄰郭猶紛擾。何暇馳情念索居。

十一元
過金園寺次丁彥誠韻簡茂上人楊文可

風塵久別恨悠悠。飄泊江湖一葉舟。野寺偶逢煙雨暮。故園徒憶稻粱秋。關心爲問來何去。握手相看喜復憂。賴有茂師能好客。茗甌棋局且綢繆。

三四寒
斑竹簾

湘妃淚灑碧琅玕。剪織疎簾拭未乾。細縷引風宜隔暑。濕痕含雨欲生寒。燈前照耀琉璃潔。月下爛斑玳瑁看。直榦盡輸兵革用。高堂舒卷莫摧殘。

三五
題梅莊圖

聞說幽棲甃社湖。只栽梅樹繞儲胥。枝橫暮雪春回早。香滿寒庭月上初。五柳門前元亮宅。百花潭北少陵居。歲寒心事清無比。寫入丹青意

有餘。

寄童煉師二首

憶別青元老煉師。秋風又是一年期。重城只比蓬萊隔。落月寧忘夢寐思。掃葉仙壇供自爨。茹芝丹室少人知。壺中固有長生術。鏡裏還添幾縷絲。

四支

歸來無處覓安居。謾向東郊結草廬。日落帶煙鋤町疇。夜深聽雨隔蘆條。未能種木長留客。頗愛移舟靜釣魚。八月秋高香稻熟。肯飛鳧鳥下

村墟。

六魚

寄題愛日軒

堂前蘭玉繞階除。堂上尊章樂有餘。自是曾參能奉饌。最憐潘岳解扶輿。花溪地暖多生筍。蓮沼波深足養魚。寸晷不違思定省。百年宜爾惜居諸。

送陶元庸之越

八庚下平

江花白白柳青青。風送蘭舟五兩輕。刀筆去干丞相府。經綸爲贊越王城。蘭亭日暖風流在。蓮

幕春閒夢寐清。佇聽鳴珂振閭里。倚門懷抱不勝情。

八庚

題謝氏友竹軒

脩竹千竿繞戶庭。主人爲結歲寒盟。春風對酒聽鶯語。夜月吹笙引鳳鳴。最愛虚心忘爾汝。相期秉節老平生。何當竟造琅玕下。嘯咏同分几席清。

六魚

題湖山小隱

愛汝湖山小隱居。地臨幽僻世情疎。湘簾春水

溶溶濶。草閣晴嵐冉冉虛。碧篠移來當戶種。黃精覓去帶經鋤。何時共赴鷗波約。醉臥看雲醒釣魚。

十二庚

寄明長老東白

江南三月雨泔泔。花落花開總不禁。况是萬方多難日。何堪獨客故鄉心。九龍峯下泉聲咽。陸羽祠前草色深。苦憶山中舊尊宿。幾時携手一登臨。

一先

寄飛卿

獨羨城南張隱士。鬢髭如雪腹便便。青燈有子能傳業。白日無人只醉眠。溪郭畬田多種秫。市橋鮭菜少論錢。相思不得常相見。準擬歸來樂暮年。

五微

寄陶德和

昔謁行軒君未歸。虛勞枉駕事多非。燕鴻無意偶相避。鷄黍有期寧敢違。江上浮雲晴漠漠。城南流水路依依。興來便欲乘舟去。猶恐山陰書掩扉。

十二文
上平

寄季充姪

華氏儒風久蕭索。賴有汝輩張吾軍。匡衡苦心不倦學。陸機自小能爲文。詠歌溪上共明月。倚杖江邊愁暮雲。竹林之游遲亦得。少年冠蓋今紛紛。

七言
上平

春雪和韻

寒雲結陰濕模糊。六花散漫飄虛無。誰披鶴氅似仙子。獨擁貂裘惟老夫。鈎簾掃逕望溪棹。呵筆賦詩呼硯鑪。妖氛滌盡麗日出。鸞花爛熳歌

王都。

芭蕉

牕外芭蕉映碧油。翠綃成幄覆清幽。從添夜雨
瀟瀟響。可愛晴雲冉冉浮。學扇近人能却暑。題
詩留客不禁秋。高柯好護青青玉。要使相輝竹
外樓。

上平

謝顧存義貽畫竹

郎官惜別意何殊。贈我湘江水墨圖。千畝篔簹
迷杳靄。一川煙雨濕模糊。毫端緬想情無極。座

右相看興不孤。莫訝行囊多卷束。此君一日可
能無。

八庚

次李玉林韻

玉林道士神仙客。海上相逢識姓名。酌酒賦詩
狂太白。呼羊起石老初平。身中玉髓千年換。鼎
內丹砂九轉成。願授長房縮地法。得從仙珮啓
玄情。

下平

題呂氏滄浪亭

溪上幽居俯碧流。溶溶渾似泛虛舟。湘簾卷浪

邀明月。書幌寒雲。瞰白鷗。漁父休歌水清濁。高
人不與世沉浮。都來只尺滄洲趣。涵泳乾坤萬
里秋。

一
平

上徐相國

王師赫赫來江淞。十五降城總望風。海內已歸
新聖主。幄中今見舊元戎。經綸大業千年事。
竹帛高名一代功。佐理清朝均雨露。蒼生歌舞
樂年豐。

十五刪

題天游畫

老龍駢駢隱雲間。揮灑翰墨心神閒。移來子真
谷口樹。寫出米家江上山。峨峨翠巘遠能致。渺
渺丹梯高可攀。白雲深處有仙子。爲求大藥駐
朱顏。

選

賀彥容弟得孫女

勝事從來不可期。華堂吉夢日相隨。兒初得子
春風夜。翁喜抱孫年少時。今日醉叨湯餅客。明
年重賦弄璋詩。吾宗積善由來遠。從此門楣須
爾爲。

七言絕句

擬比紅兒賦解語花二首

綽約柔情不自勝。翠圍紅繞幾層層。隔簾立盡
欄杆月。却訝真真喚即應。

詩卷中
十卷

霧縠雲綃淡淡粧。微風吹散鬱金香。臨風一片
傷春意。欲向何人訴斷腸。

七陽

詠玉繡毬花

五微

江南春雪作團飛。飛入園林僅尺圍。玉女夜寒
眠不得。一簾香露絡珠璣。

題杜韋娘圖

七陽

霞佩飄飄金縷香。緩歌白雪韻悠揚。華堂舊日
風光在。見慣司空亦斷腸。

次元暈春雪

十庚

光涵翠箔淨氛埃。寒隔珠簾曉未開。喚起阿環
春睡覺。笑呵纖手近粧臺。

栖碧先生黃楊集補遺

畢

黃楊集附錄

栖碧處士壙誌銘

俞貞木

處士姓華氏諱勿武字彥清號栖碧世爲常之
無錫人曾祖考諱友聞元仕無錫州稅務提領
祖考諱璞潛德弗仕考諱鉉元仕都功德使司
都事妣陳氏寡居三十餘年有司以貞節上聞
表其門曰貞節里曰旌節處士性溫厚而孝自
六歲喪其父事母甚共謹幼時常戲于庭聞母
語及平生事乃竊聽之遂捐所戲而號慟母遽

引入問之。具言所聞痛切。於是母亦爲之泣下。家人嗟異之。旣長。奉其祖篤孝敬。祖亦鍾愛之。每與人言。必指之曰。他日繼我者。在此孫也。及祖卒。承重哀痛如禮。事其仲父如父。因顏其堂曰順德。一門共爨。怡怡如也。仲父旣歿。羣從昆弟。欲析產異居。處士聞而嘆曰。何苦若是。吾豈較乎。且財有盡而義無窮。吾惟長者之命是聽。其昆季或有所爭。皆弗與競。每作詩遺之。使之自愧。終弗辯也。訓子孫必稱祖德。凡所經營。一

遵祖訓。嫁女則手書女誡以授之。使執婦道。母年逾六旬。因病喪明。處士傾貲修藥。不能愈。日增憂苦。母曰。吾老矣。當自遣。無足憂也。於是常召親媼。與其母敬愛者。歡會無虛日。惟冀母之忘其疾苦耳。歲癸巳。家燬於火。處士適在郭。聞之。亟問母安否。卽馳騎歸。見母無恙。心始釋然。他不問也。其後仍構貞節堂。春草軒。以奉養。時母年已七十矣。力可以娛其親者。無不爲之。尤篤於尊賢親友。侍講黃文獻公晉卿。承旨張潞

公仲舉尚書千公壽道翰林段公吉父李公一
初著作李公季和遂昌鄭明德京口陳子貞吳
郡陳子平方外張伯雨皆忘年折節與交處士
皆以嚴事之故其上世墓碣銘文及貞節堂春
草軒皆樂爲之紀述而詠歌也所以處士之學
日益進名聲籍籍諸公間宗鄙咸推仰之其家
居愷悌下至臧獲亦罕逢其怒能者任之拙者
矜之未嘗顯言其過使之懷愧耻也見寒餒無
依者輒戚戚然識與不識必思濟之於宗姻故

舊歲時贈遺有常凡有寄託於處士者終身不
渝也性不嗜酒而喜待賓雖稠人廣席必酬酢
盡歡而後已朋游或有援之仕者力辭不就母
亦以都事君出而嬰疾每不喜遠游况嗣續之
重在處士一身一則承順親志二則其天性恬
澹亦不汲汲進取晚年辟地姑蘓客居旅邸於
調恤亦隨力施之不倦嘗語諸子曰我見義不
爲則心不遑安又曰我過艱險初無所思一聽
於天幸亦無甚患也其心志槩可見矣雅好吟

咏。自壯至老不衰。寒暑憂樂不廢。有黃楊集若
于卷藏于家。生大德丁未十月六日。卒洪武乙
卯正月十八日。年六十九。以二月二十日葬梅
里鄉羅村之原。其自十也。娶鄒氏先四十年卒。
繼顧氏。肅恭閨闈。勤儉克家。賢而能相其夫。奉
姑孝順。子男七人。完鞞、棕鞞、恭鞞、同鞞、隆鞞、恒
文鞞。惟恭鞞蚤卒。恒出繼徐氏女五人。如貞壻
錢明善、松貞壻、陶宗毅、桐貞。早卒。守貞壻、楊儵
原貞壻、徐翼、孫男十五人。女七人。曾孫男女若

千人。嗚呼處士之先世。貴雄于鄉。或仕或隱。積
善好施。殆非一人。至處士讀書好禮。謙退若儒
生。蓋不以富而驕逸也。孝義之行。人所共推。雖
其才不見於用。而卒能保身令終足矣。况有子
孫繼述哉。後若干年。完鞞奉其執友教諭呂君
志學之狀來徵誌石。乃叙而銘之。銘曰。嗟君乳
乳蚤失怙。鞠育撫養。賴賢母。詩禮教誡。敬遵祖
迨夫成人。友是輔。博學善藏。類良賈。澹然冲襟。
倦進取。吟哦詩章。窮纂組。宮商相宣。見辭吐。厥

德允修蹈規矩。不奢不驕。人莫迓。孝義之行。若陽煦。壽考以終。在衡宇。子克承家。有餘祐。羅村之原。曰堅土。深藏固密。永終古。

春草軒記

張翥

華爲毘陵望族。都事君子舉。初以材薦。得宿衛武宗朝。勤敏靖共。著稱環列。一命爲都功德使。司都事。居無何。告病南歸。歸五月而卒。年二十有六。夫人陳長君。二歲而寡。一子幼。武六歲。二女復幼。迺自誓不再適。屏膏沐。躬饋祀。其事舅

姑。盡敬養之孝。其待姻族。盡惇睦之愛。其治家業。盡艱難之勞。使都事君之緒。有引無替。而是藐諸孤。教撫成立。爲賢子。子復四孫。皆嶄嶄知讀書。歲時奉觴前。爲壽。夫人神清氣強。宴怡以樂。州里父老。相與歎美。爲狀其實。有司以聞。後至正二年。中書表其門。曰貞節里。曰旌節。嗚呼。天於貞賢之報。信必至此。而後申之也。惟幼武每痛先人之蚤世。其嗣續幾絕。微夫人將無以至於今休。迺構堂曰貞節。軒曰春草。堂則夫人

居之。軒則幼武奉親之所周旋也。於是翰林黃公晉卿爲銘于堂。顧謂是軒不可以無紀。來請余文。余觀夫天地之間。茫然而生。廡然而滋者。唯草爲多。而爲物固微也。方其土膏脉發。勾折萌達。孰非春陽之所育。暉光之所被。而一寸之心。亦得夫天地之心以生。則是草宜亦有報春暉之心矣。彼葵藿之傾太陽。君子謂其向之者誠。而况人乎。况於孝子慈孫乎。昔孟東野發興於慈母之線。游子之衣。而致意於難將寸草心。

報得三春暉之語。深得古風人之旨。讀是詩者。孝感之心。蓋油然而生矣。然以規游子可也。今幼武家居。奉母雍容軒中。而猶有取於此。則其報親之心。無窮期也。無窮期也。心果止是乎哉。必也孝子潔白如雅之白華。使其身立其名揚。其親顯。所以期於子者。又在乎此。不旣重且遠歟。幼武起謝曰。然遂爲之書。

栖碧軒記

陳方

浙西之地。水多山少。常於浙西數郡之間。而山

尤少。自晉陵竝西而南。蜿蜒靡迤。或起或止。至無錫而山之最著者。惠山也。然無重巒疊嶂之紆互。深溪巨壑之險阻。率然起於平地。如奔鯨逸馬。不可羈而留也。餘則散於四封之中。瓜蔓相接。大率隱隱皆培塿。形孤勢薄。它郡之山。可孩而撫之。又自惠山之東。沃壤夷衍。相去三十里。而遠。其山之匹於惠者。曰垓山。亦無曲折之美。窳窳之雄。直望之而可喜耳。距兩山之所向其地。曰梅里。意唐李紳之居於是。今華君彥清

家焉。始余之未識彥清也。有人持其栖碧軒詩。一大軸。從余觀之。余見其所圖之水木清美也。喜曰。無錫之山有是哉。余昔過其境而見者甚少。而淺近。未有如圖之清美者也。近年余爲其家童子師。由是問所謂栖碧者。然後惟其所居之平且曠也。何取於李白問余栖碧山之詩。彥清謂余曰。古之高人逸士。野居而澗處者。未必皆山也。使可耕之地。可安之廬。長林美竹。雜花豐草。而得與世相忘足矣。奚俟夫山之深且秀。

哉。夫栖於山者。又未必皆知山之爲可樂。如知山之可樂。則居雖無山。常若居於山也。况吾居之西。則惠山界其右。東則堠山峙其左。雲霧朝夕之變態。風雨晦暝之異狀。未嘗不接於吾目也。夫於山之尤少之地。而有以映帶於戶限之前。則栖碧之名不爲虛也。然則在山者不見山。惟置身於其外者能見之。若栖碧者。其能見於山之外者。歟。余知彥清之志者也。聞其言而是之。彥清因請余記。於是乎書。彥清名幼武。孝謹。

而和易雅好文章。與余友。後至元二年十月一日記。

題貞固春草第二軒

劉衢

余客錫山。過華公愷。登其草堂。乃先君栖碧先生舊有軒曰春草。今公愷雖抱夙疾。而能不忘先世。昆季以次序而續之。公愷得第二焉。於是出示先生所著黃楊集句法。如長江大河。瀚漫周浹。非鏤冰斫雪之可比。公愷將鉉梓以傳。可謂孝矣。

森森喬木蔭衡門。堂下椿萱生暖雲。愧我無從
追薄養。羨君有義荅深恩。巢烏哺母猶思報。人
子忘親奚足論。想見君家多積德。致能流澤到
兒孫。



